

Ang Pagtuga

Basaha ang mosunod nga impormasyon nga makita sa [temples.ChurchofJesusChrist.org](https://www.temple.ChurchofJesusChrist.org), nga mangita sa mga tubag sa mosunod nga mga pangutana:

- Sa unsang paagi ko gipanalangin sa Ginoo samtang nadawat nako ang akong pagtuga?

Dihang nagpasakop ka sa Simbahan, nakadawat ka og duha ka ordinansa: bunyag ug pagkompirma. Sa susama, ang pagtuga sa templo madawat sa duha ka bahin.

Sa unang bahin, kamo pribado ug indibidwal nga makadawat sa gitawag nato og “initiatory” nga mga ordinansa. Kini nga mga ordinansa naglakip sa espesyal nga mga panalangin mahitungod sa imong balaang panulondon ug potensiyal. Isip bahin niini nga mga ordinansa, tugotan usab ka sa pagsul-ob sa sagrado nga garment sa templo.

Sa ikaduhang bahin, ikaw makadawat sa nahibilin sa imong pagtuga kauban sa grupo. Kini mahitabo sa usa ka lawak sa panudlo kauban ang ubang tawo kinsa nagtambong sa templo. Ipresentar ang mga panghitabo nga kabahin sa plano sa kaluwasan. Apil niini ang Paglalang, ang Pagkapukan ni Adan ug Eva, ang Pag-ula ni Jesukristo, ang Apostasiya, ug ang Pagpahiuli. Ikaw makat-on usab og dugang mahitungod sa paagi nga ang tanang tawo makabalik ngadto sa presensya sa Ginoo. Ang uban sa tuga gipresentar pinaagi sa bidyo ug ang uban pinaagi sa mga tigpasiugda sa templo.

Panahon sa ordinansa sa pagtuga, dapiton ka sa paghimo og partikular nga mga pakigsaad uban sa Dios. Apil niini nga mga pakigsaad ang mosunod:

- Balaod sa Pagkamasulondon, nga naglakip sa pagpaningkamot sa pagtuman sa mga sugo sa Dios
- Balaod sa sakripisyo, nga naglakip sa pagbuhat sa tanan nato nga mahimo sa pagsuporta sa buhat sa Ginoo ug paghinulsol uban sa masulub-ong kasingkasing ug mahinulsolon nga espiritu
- Balaod sa ebanghelyo, nga mao ang mas labaw nga balaod nga gitudlo ni Jesus sa dihang Siya dinhi pa sa yuta
- Balaod sa kaputli, nga naglakip sa sekswal nga relasyon ngadto lamang sa tawo diin kita legal ug pinasubay sa balaod nga gikasal sumala sa balaod sa Dios
- Balaod sa pagpahinungod, nga naglakip sa pagpahinungod sa atong panahon, mga talento, ug sa tanan nga gipanalangin sa Ginoo kanato sa pagtukod sa Simbahan ni Jesukristo dinhi sa yuta

Dihang imong tumanon ang imong mga pakigsaad, maduol ka sa Manluluwas ug mas gamhanang motubo ang imong relasyon Kaniya. Ang Dios misaad nga kadtong motuman sa ilang mga pakigsaad makadawat og mga panalangin niini nga kinabuhi ug makabaton og oportunidad sa pagpuyo og balik uban Kaniya sa kahangtoran.

Sa kataposan sa pagtuga, ang mga partisipante sa simbolo nga paagi mosulod ngadto sa presensiya sa Ginoo samtang mosulod sila sa celestial nga lawak. Didto ikaw makagahin og panahon sa pagpamalandong, pag-ampo, pagbasa sa mga kasulatan, o hilom nga mopakigbahin sa imong mga kasinatian uban sa pamilya ug mga higala. Dapit kini sa kalinaw, diin usab makakita kamo og kahupayan ug balaan nga giya. (Tan-awa sa “About the Temple Endowment,” [temples.ChurchofJesusChrist.org](https://www.temple.ChurchofJesusChrist.org).)

Ang Ehemplo ni Brigham Young

Panaghisgot 1

ANG HAGIT SA PUBLIKONG PAKIGPULONG

Pagsugod pinaagi sa pagpangutana og sama sa mosunod:

- Unsay imong gibati bahin sa publikong pakigpulong? Ngano man?

Basaha o i-summarize ang mosunod:

Usa sa kinadak-ang hagit ni Brigham Young mao ang publikong pakigpulong. Siya miingon, “Kon bahin sa pagsulti sa publiko, ako ang pinakamakaluluoy sa tanang tawo” (sa *Journal of Discourses*, 5:97). Nahinumdoman niya usa niana ka higayon usa ka semana human sa iyang bunyag dihang nagdahom siyang mamulong ang upat ka sinati mamumulong nga mga miyembro sa Simbahan, pero wala nila ni himoa. Miingon siya:



Wala gyod koy kasinatian sa publikong pakigpulong ug sa kahibalo sa kalibotan; apan anaa nako ang Espiritu sa Ginoo, ug mibati ko nga morag nagkalayo ang akong bukog gawas kon moistorya ko sa mga tawo ug sultihan sila sa mga butang nga akong nakita, nadungog, ug nakat-onan—unsa ang akong nasinati ug gikalipay; ug ang akong labing unang pakigpulong miabot og kapin sa usa ka oras. Giukab ko ang akong ba-ba ug ang Ginoo mipuno niini. (Brigham Young, sa *Journal of Discourses*, 13:211)

- Nganong lisod ang gihimo ni Brigham Young?

Dapita ang mga estudyante sa pagbasa sa Doktrina ug mga Pakigsaad 100:5–6 (tan-awa usab sa Exodo 4:12; Proverbios 16:1). Dayon pangutana:

- Sa unsang paagi ang kasinatian ni Brigham Young konektado niini nga mga bersikulo?
- Unsay imong nakat-onan mahitungod sa Ginoo nga makatabang nimo?

Ipakigbahin kon unsay imong gibati bahin sa pagsalig sa Ginoo ug sa kaandam sa pagpakigbahin sa imong nakat-onan.

Panaghisgot 2

ANG SAKRIPISYO NI BRIGHAM ARON MAKASERBISYO

Sugdi pinaagi sa pagpangutana og sama sa mosunod:

- Unsay mga angayng isakripisyo aron magserbisyo sa usa ka misyon?

Basaha o i-summarize ang mosunod:

Sa pareho nga tuig nga nabunyagan si Brigham Young, namatay ang iyang asawa. Uban ang dakong pagsakripisyo, gihikay niya nga maatiman ang iyang duha ka anak ug nagserbisyo sa mga misyon sa New York ug ibabaw nga bahin sa Canada, diin gibunyagan niya ang daghang tawo.

Human makaserbisyo og mga usa ka tuig sa misyon, gihulagway ni Brigham ang iyang pag-abot sa Kirtland, Ohio:



Kon adunay tawo nga nakig-uban sa mga Santos nga mas pobre pa kay kanako—tungod kini kay wala siyay bisan unsa. . . . Duna akoy duha ka mga anak nga atimanon. . . . Usa ako ka biyudo. . . . Walay sapatos sa akong tiil, gawas sa hinulaman nga usa ka parisan sa botas. Ako walay sinina alang sa tingtugnaw, gawas sa hinimo nga kupo nga tulo o upat na ka tuig. . . . Mibiyahe ako ug misangyaw ug mihatag sa matag dolyar sa akong kabtangan. (*Mga Pagtulun-an sa mga Presidente sa Simbahan: Brigham Young* [1997], 243)

Dapita ang usa ka estudyante sa pagbasa sa Lucas 18:18–23, nga mangita kon sa unsang paagi ang tubag ni Brigham Young sa mga pagdapit nga moserbisyo lahi gikan sa usa ka tawo nga nakig-istorya sa Manluluwas niini nga asoy.

- Unsay imong nahibaloan bahin sa Ginoo nga makatabang natong andam nga mosakripisyo sama sa gihimo ni Brigham Young?
- Agig dugang sa pagserbisyo sa mga misyon, unsa pay laing paagi nga gusto sa Ginoo nga mosakripisyo kita para Kaniya?

Ipakigbahin ang imong gibati bahin sa pagkaandam nga mosakripisyo aron moserbisyo sa Ginoo.

Panaghisgot 3

MISYON NI BRIGHAM SA ENGLAND

Sugdi pinaagi sa pagpangutana og sama sa mosunod:

- Unsay pipila ka rason kon nganong kinahanglan sa usa ka misyonaryo ang tabang sa Ginoo?

Basaha o i-summarize ang mosunod:

Human magminyo pag-usab ug moserbisyo sa lima pa ka laing misyon, gitawag si Brigham, uban sa laing Apostoles, sa pagserbisyo sa usa ka misyon sa England.

Gihulagway ni Brigham ang iyang misyon:



Miabut kami . . . isip mga langyaw sa usa ka langyaw nga yuta ug walay kwarta, apan pinaagi sa kalooy sa Dios nakaangkon kami og daghang mga higala, mitukod og mga Simbahan sa hapit tanang inila nga lungsod ug siyudad didto sa gingharian sa Great Britain, mibunyag og pito ngadto sa walo ka libo, mi-imprinta og 5,000 ka Basahon ni Mormon, . . . ug mibiya nga gitinum diha sa mga kasingkas-ing sa liboan ang mga liso sa mahangturong kamatuoran . . . : sa tanan niini nga mga butang akong pasalamatang ang kamot sa Dios. (*Mga Pagtulun-an sa mga Presidente sa Simbahan: Brigham Young* [1997], 6)

Dapita ang usa ka estudyante sa pagbasa sa mga pulong ni Ammon sa Alma 26:12–13. Dayon pangutana:

- Sa unsang paagi gikompara ang mga pamahayag ni Brigham Young ngadto ni Ammon?
- Sa imong hunahuna, nganong importante ang pagsalig sa Ginoo dihang naningkamot ka sa pagserbisyo Niya?
- Sa unsang paagi ka naningkamot nga mosalig sa Ginoo samtang nagserbisyo Kaniya?

Ipakigbahin ang imong mga hunahuna o mga pagbati bahin sa pagsalig sa Ginoo samtang nagserbisyo ka Kaniya.

Pagtudlo og mga Kamatuoran gikan sa Doktrina ug mga Pakigsaad 130

Pagpangandam sa leksiyon:

Lakang 1: Pagpili og usa sa mga hilisgotan sa ubos ug tun-i ang gihatag nga mga kapanguhaan. Hatagig pagtagad ang mga hunahuna, mga ideya, ug mga impresyon gikan sa Espiritu Santo mahitungod kon unsa ang imong gibasa. Pwede usab kang mangita og uban pang mga kapanguhaan aron mas mapalawman ang imong pagsabot sa imong napili nga hilisgotan.

Lakang 2: Paghimo og lima ngadto sa pito ka minutong outline sa leksiyon sa imong napili nga hilisgotan. Ikon-siderar ang paggamit sa mosunod nga mga pangutana aron makapangandam ka:

- Sa unsang paagi kini nga mga kamatuoran makaapektar o angayng makaapektar sa atong relasyon sa Langitnong Amahan ug ni Jesukristo?
- Unsaon nako paggamit ang mga kasulatan ug pulong sa mga propeta aron tabangan ang uban nga mas masabtan kini nga hilisgotan?
- Unsay akong mahimo aron sa pagtabang sa uban nga maminaw sa leksiyon ug aktibong makapakigbahin?
- Unsay mga kasinatian ang akong ipakigbahin o unsay akong ipamatuod?
- Unsay akong mahimo aron tabangan ang uban nga gamiton kini nga hilisgotanngadto sa ilang mga kinabuhi?

Hilisgotan nga tun-an ug mga kapanguhaan:

OPSIYON 1: KAHIBALO UG SALABOTAN MOUBAN KANATO PANAHOON SA PAGKABANHAW.

Mga kapanguhaan nga tun-an:

Doktrina ug mga Pakigsaad 130:18–19; tan-awa usab sa Doktrina ug mga Pakigsaad 88:118; 93:36

Si Elder Neal A. Maxwell (1926–2004) sa Korum sa Napulog Duha ka Apostoles mitudlo:



Kon mamalandong lamang kita kon unsay atong madala sa pagkabanhaw, daw klaro nga ang atong salabotan atong madala, buot ipasabot dili lamang ang atong IQ, apan ang ato usab nga kapasidad sa pagdawat ug paggamit sa kamatuoran. Ang atong mga talento, mga hiyas, ug mga kahanas atong madala; sigurado usab nga ang atong kapasidad sa pagkat-on, ang kapasidad sa atong pagdisiplina sa kaugalingon, ug ang atong kapasidad sa pagtrabaho. (Neal A. Maxwell, *We Will Prove Them Herewith* [1982], 12)

OPSIYON 2: MAKADAWAT KITA OG MGA PANALANGIN GIKAN SA DIOS PINAAGI SA PAGTUMAN SA IYANG MGA BALAO.

Mga kapanguhaan nga tun-an:

Doktrina ug mga Pakigsaad 130:20–21; tan-awa usab sa Juan 7:17; Doktrina ug mga Pakigsaad 82:10

Si Presidente Russell M. Nelson mitudlo:



Kon ganahan gayod ka og piho nga panalangin, kinahanglan kang mahibalo kon unsang mga balaod ang nagmando sa maong mga panalangin ug dayon maningkamot sa pagtuman sa maong mga balaod. (Russell M. Nelson, “The Mission and Ministry of the Savior: A Discussion with Elder Russell M. Nelson,” *Ensign*, Hunyo 2005, 19)

OPSIYON 3: ANG LANGITNONG AMAHAN UG SI JESUKRISTO ADUNAY MGA LAWAS NGA UNOD UG MGA BUKOG. ANG ESPIRITU SANTO USA KA PERSONAHE SA ESPIRITU.

Mga kapanguhaan nga tun-an:

Doktrina ug mga Pakigsaad 130:22–23; tan-awa sab ang Mateo 3:13–17; Mga Buhat 7:55–56

Si Elder Jeffrey R. Holland sa Korum sa Napulog Duha ka Apostoles mitudlo:



Kita nagtuo nga kining tulo ka balaanong mga tawo nga naglangkob sa usa ka Dios nga Kapangulo- han nagkahiusa sa katuyoan, sa pamaagi, sa pagpamatuod, sa misyon. Kita nagtuo Kanila nga puno sa samang diosnong pagbati sa kaluoy ug gugma, kaangayan ug grasya, pailob, pagpasaylo, ug katubsanan. Sa akong hunahuna tukma kini sa pag-ingon nga kita nagtuo nga Sila usa sa mahinung- danon ug mahangtorong kinaiya nga mahunahuna *gawas* nga kita wala magtuo Kanila nga tulo ka mga tawo nga giusa ra diha sa usa ka lawas. . . . Kita mamahayag nga kini klaro bisan walay lain pa nga pruweba [self-evident] gikan sa mga kasulatan nga ang Amahan, ang Anak, ug ang Espiritu Santo managlahi nga mga tawo, tulo ka balaanong mga binuhat. (Jeffrey R. Holland, “Sa Bugtong Tinuod nga Dios ug kang Jesukristo nga Iyang Pinadala,” *Liahona*, Nob. 2007, 40–41)

Gidapit kita ni Jesukristo nga Mangandam sa Iyang Ikaduhang Pag-anhi pinaagi sa . . .

. . . pagbiya sa Babelonia (pagkadaotan) (tan-awa sa Doktrina ug mga Pakigsaad 133:4–5, 7, 12–14).

Si Presidente Dieter F. Uchtdorf, kanhi sa Unang Kapangulohan, mitudlo:



Ang karaang siyudad sa Babelon nalaglag. Ang kaanindot niini dugay nang nawala. Apan ang pagkakalibutanon ug kadautan sa Babelon nagpadayon. Karon atong responsibilidad nga magpak-abuhi isip mga tumutuo niining walay pagtuo nga kalibotan. . . . Kinahanglan kita nga magpabiling kalma ubos sa pagpamugos sa mga kahigalaan, dili madani sa popular nga uso o mini nga mga propeta, mobaliwala sa pagtamay sa dili diosnon, mobatok sa pagtintal sa dautan, ug mobuntog sa atong katapulan. (Dieter F. Uchtdorf, “Ayaw Kahadlok, Sumalig Ka Lamang,” *Liahona*, Nob. 2015, 77–78)

. . . pagtigom sa Israel (tan-awa sa Doktrina ug mga Pakigsaad 133:4, 7–9, 37–38).

Gipahinumdoman ta ni Presidente Russell M. Nelson:



Bisan kanus-a nga mobuhat kamo og *bisan unsa* sa pagtabang ni *bisan kinsa*—sa matag habig sa tabil—nga mopadulong sa paghimo og mga pakigsaad sa Dios ug sa pagdawat sa ilang mahinungdanong mga ordinansa sa bunyag ug templo, nagtabang kamo sa pagpundok sa Israel. Ingon lang niana ka yano. (Russell M. Nelson, sa “Paglaom sa Israel” [tibuok kalibotan nga debosyonal sa kabatan-onan, Hunyo 3, 2018], [broadcasts.ChurchofJesusChrist.org](https://www.broadcasts.ChurchofJesusChrist.org))

. . . paghinulsol ug pagkahimong nabalaan pinaagi ni Jesurkristo (tan-awa sa Doktrina ug mga Pakigsaad 133:5, 16, 34–35, 62).

Si Sister Carol F. McConkie, kanhi Unang Magtatambag sa Kinatibuk-ang Kapangulohan sa Young Women, mipasabot:



Uban sa hugot nga pagtuo kang Jesukristo ug sa Iyang Pag-ula, malimpyo kita, walay lama, kon ilimod nato sa atong mga kaugalingon ang tanan nga dili diosnon ug sinsero nga maghinulsol. Gibunyagan kita pinaagi sa tubig alang sa kapasayloan sa mga sala. Ang atong mga kalag gibalaan sa dihang gidawat nato ang Espiritu Santo uban sa bukas nga mga kasingkasing. Kada semana, nagambit kita sa ordinansa sa sakramento. Diha sa espiritu sa paghinulsol uban ang sinserong mga tinguha alang sa pagkamatarong, nakigsaad kita sa pagdala diha kanato sa ngalan ni Kristo, paghinumdom Kaniya, ug paghupot sa Iyang mga sugo aron sa kanunay makabaton sa Iyang Espiritu uban kanato. (Carol F. McConkie, “Ang Katahom sa Pagkabalaan,” *Liahona*, Mayo 2017, 10)

Nagtuo Kami nga Kinahanglang Tumanon ang mga Balaod sa Gobyerno Diin Kami Nagpuyo

Basaha ang mosunod nga senaryo.

Si Dalia nagserbisyo sa usa ka misyon diin wala itugot sa gobyerno ang pagpakigbahin sa ebanghelyo sa gawas sa bilding sa simbahan. Naguol siya kay nahibalo siya nga naay mga tawo sa siyudad nga modawat unta sa ebanghelyo ni Jesukristo kon gawasnon lang siyang makaistorya bahin niini. Naghunahuna siya nga maalamong makig-istorya sa mga tawo diha sa dalan aron tudloan sila bahin sa Manluluwas.

- Unsaon ninyo pagtubag niini nga sitwasyon?

Basaha ang mosunod nga mga materyal, nga maghunahuna kon sa unsang paagi kini makatabang kang Dalia nga masabtan kon unsay gusto sa Langitnong Amahan nga ipahimo kaniya.

Doktrina ug mga Pakigsaad 58:21–22

Mga Artikulo sa Hugot nga Pagtuo 1:12

1 Timoteo 2:1–3

Aron mahibaloan giunsa pagtubag sa Manluluwas sa posibleng panagsumpaki sa gobyerno ug relihiyon, basaha ang Mateo 22:15–22 ug ang mosunod nga pamahayag ni Presidente Dallin H. Oaks sa Unang Kapangulohan:



Samtang ang tanang mga tumutuo nagtahod sa balaan nga balaod, ang kadaghanan usab miila nga ang sibil nga balaod gi-orden usab sa Dios. Si Ginoong Jesukristo misugo, “Bayri ninyo si Cesar sa mga butang nga iya ni Cesar, ug ang Dios sa mga butang nga iya sa Dios” (Mateo 22:21). Busa kita gitudloan, kutob sa mahimo, sunda ang *duha* ka sistema sa balaod. Kon dunay umaabut nga panagbingkil, kinahanglan nga kita magtinguha nga masulbad kini. Kon kini dili na gayud masulbad, kita kinahanglan nga moapil sa uban sa samang hunahuna sa pagpaningkamot sa pag-usab sa sibil nga balaod aron matuman ang balaan. Sa tanang mga panghitabo, kita kinahanglan nga magmabinantayon sa dili pa mohukom—sa panagsa ra kaayo nga mga sirkumstansya—sa pagbaliwala sa usa aron mapaboran ang lain. (Dallin H. Oaks, “The Boundary between Church and State” [pakigpulong nga gihatag sa Second Annual Sacramento Court/Clergy Conference, Oct. 20, 2015], newsroom.ChurchofJesusChrist.org)

Tubaga ang mosunod nga mga pangutana.

- Unsay imong nakat-onan nga makatabang kang Dalia nga masabtan nga kinahanglan niyang sundon ang mga balaod diin siya nagserbisyo?
- Sa imong hunahuna, nganong ang pagtuman sa balaod diin ka nagpuyo maoy usa ka baroganan sa ebanghelyo ni Jesukristo?

Nagtuong Kami sa Kagawasan sa Relihiyon ug sa Tanlag

Tubaga ang mosunod nga mga pangutana.

- Kanus-a ang kataposang higayon nga naghisgot ka og relihiyon o espirituwal nga tinuohan uban sa usa ka tawo nga lahi nimong tinuohan?
- Unsay ilang tubag sa imong mga gituohan? Unsay imong tubag sa ilang gituohan?

Ikonsiderar ang mosunod nga senario.

Si Liam sakop sa soccer team sa eskwelahan. Usa sa mga sakop sa iyang team, si Zain, adunay personal nga relihiyosong ritwal nga iyang gihimo sa dili pa magsugod ang matag dula. Si Zain lamang ang tawo sa ilang team nga aduna niana nga relihiyon. Namatikdan sa ubang sakop sa team ang gihimo ni Zain ug gisugdan siyag saway tungod niini. Nahibalo si Liam nga usahay negatibo og panglantaw ang mga tawo sa ilang komunidad sa relihiyon ni Zain.

Tun-i ang mosunod nga mga materyal, nga maghunahuna kon unsaon kini paggamit sa sitwasyon ni Liam ug sa imong inter-aksiyon niadtong lahi og tinuohan kay kanimo.

Alma 30:7–9

Mga Artikulo sa Hugot nga Pagtuo 1:11

Si Propeta Joseph Smith (1805–44) mitudlo:



Kon kini gikapakita nga ako andam nga mamatay alang sa usa ka “Mormon,” ako prangka nga mopahayag sa atubangan sa Langit nga ako ingon ka andam nga mamatay aron pagdepensa sa mga katungod sa Presbyterian, sa Baptist, o sa maayong tawo bisan unsa nga denominasyon; tungod sa samang baruganan nga motamak sa mga katungod sa mga Santos sa Ulahing mga Adlaw nga motamak sa mga katungod . . . o bisan unsa nga relihiyosong grupo nga dili kaayo inila o sobra ka huyang sa pagdepensa sa ilang kaugalingon.

Kini mao ang gugma sa kagawasan nga nagdasig sa akong kalag—sibil ug relihiyosong kagawasan sa tibuok katawhan. (*Mga Pagtulun-an sa mga Presidente sa Simbahan: Joseph Smith* [2007], 345)

- Unsay imong ipakigbahin kang Liam nga makatabang niya sa pagtubag sa iyang sitwasyon?
- Unsay imong nakat-onan bahin sa Langitnong Amahan ug ni Jesukristo nga makatabang nimo sa pagtratar niadtong lahi og tinuohan kay kanimo?

Kinsa ang mosunod human sa pagkamatay ni Joseph Smith

Sa wala pa ang iyang kamatayon, gitudlo ni Propeta Joseph Smith ang mosunod ngadto sa Korum sa Napulog Duha ka Apostoles:



Mga igsoon, . . . [a]ng pipila sa importante nga mga talan-awon duol na nga mahitabo. Basin tingali ang akong mga kaaway mopatay kanako. Ug kon ugaling buhaton gayud nila, ug ang mga yawe ug gahum nga ania kanako dili mahatag diha kaninyo, mawala kini sa kalibutan.

Apan kon magmalampason man ako sa pagbutang niini diha sa inyong mga ulo, diha mahimo na akong mahulog nga usa ka biktima ngadto sa mamumuno nga mga kamot kon itugot na kini sa Dios, ug makabiya ako uban sa tanang kalipay ug katagbawan, sa kasayuran nga ang akong buluhaton natuman na, ug ang pundasyon natukod diin ang gingharian sa Dios pagatukuron niini nga dispensasyon sa kahingpitan sa panahon.


Diha sa mga abaga sa Napulog Duha kinahanglan ang responsibilidad sa pagpangulo sa simbahan anaa dayon mopatong hangtud nga kamo mopili og lain nga mosunod kaninyo. (*Mga Pagtulun-an sa mga Presidente sa Simbahan: Joseph Smith* [2007], 646-647)

Gitudlo usab ni Joseph Smith nga ang Unang Kapangulohan mao ang bugtong grupo labaw sa Kurom sa Napulog Duha ka Apostoles, pero dihang mamatay ang propeta, mawala ang Unang Kapangulohan (tan-awa sa *History, 1838–1856* [Manuscript History of the Church], volume B-1, 691, josephsmithpapers.org).

- Base sa imong nakat-onan, unsay nakatabang kanimo sa pagtubag sa tulo ka pangangkon nga gihimo ganina?
- Unsang sumbanan ang gihimo sa Ginoo alang sa pagpadayon sa pagpangulo sa Iyang Simbahan dihang mamatay ang propeta?

Dihang mihatag og pakigpulong si Brigham Young atubangan sa mga Santos sa usa ka dakong panagtigom, daghan ang nagrekord og milagrosong kasinatian ug mibati og kompirmasyon sa Espiritu Santo.

Si Presidente George Q. Cannon (1827–1901), nga sa ulahi nagserbisyo sa Unang Kapangulohan, mipakigbahin:



Si Brigham Young . . . mibarog ug namulong sa katawhan. . . . Kadtong nanambong niana nga okasyon dili gayud makalimot sa impresyon nga miabut kanila! Kon si Joseph nabuhi gikan sa

pagkamatay ug namulong pag-usab kanila, ang hitabo dili unta kaayo hilabihan nga ikatingala kay sa nahitabo ngadto sa daghan nga mitambong niadto nga miting. Tingog gayud kadto ni Joseph mismo; ug dili lang kadto nga tingog ni Joseph ang nadungog; apan sa panan-aw sa mga tawo ang tawo nga nagbarug sa ilang atubangan daw mao gayud si Joseph. Wala nay laing nadungog nga talagsaon ug milagrosong hitabo kay sa nahitabo nianang adlaw sa presensya niana nga kongregasyon. Ang Ginoo mihatag sa Iyang katawhan og usa ka pagpamatuod diin walay luna nga gibilin alang sa pagduha-duha kon si kinsa ang tawo nga Iyang gipili nga mangulo kanila. Nakita nila ug nadungog sa ilang natural nga mga mata ug dalunggan, ug dayon ang mga pulong nga gilitok miabut, inubanan sa makadani nga gahom sa Dios, ngadto sa ilang kasingkasing, ug napuno sila sa Espiritu ug hilabihang kalipay. Tingali dunay mga kasubo, ug sa ubang kasingkasing seguro, dunay pagduha-duha ug kawalay kasiguroan; apan karon klaro na sa tanan nga ania ang tawo nga gitugyanan sa Ginoo sa gikinahanglang awtoridad nga molihok sa ilang taliwala puli ni Joseph (George Q. Cannon, "Joseph Smith, the Prophet," *Juvenile Instructor*, Oct. 1870, 174–75).

Si Emily Smith Hoyt, usa sa mga miyembro nga anaa dihang mihatag og pakigpulong si Brigham Young atubangan sa mga Santos, misulat:

Ang paagi sa pagpangatarongan, ang ekspresyon sa nawong, ang tono sa tingog nakalipay sa tibuok nakong kalag. Ang akong kaugalingong mga mata nakakita sa gipatay nga lawas ni Joseph. Ang akong kaugalingong mga kamot, nakabatayag sa iyang bugnaw, patay nga lawas. Nasayud ko nga patay na si Joseph. Apan nakugang ako kanunay ug wala tuyoa nga motan-aw sa pulpito aron makita kon dili ba kadto si Joseph. Dili gayod, si Brigham Young kadto ug kon adunay magduhaduha sa katungod ni Brigham sa pagdumala sa mga responsibilidad alang sa mga Santos, ang ako lamang masulti kanila mao kini. Angkona ang espiritu sa Dios ug sayri sa inyong kaugalingon. Ang Ginoo mosangkap alang sa iyang kaugalingon (Emily Smith Hoyt, sa Lynne W. Jorgensen, "The Mantle of the Prophet Joseph Passes to Brother Brigham: A Collective Spiritual Witness," *BYU Studies*, vol. 36, num. 4 [1996–97], 164).

- Kon naa ka didto, unsa kahay epekto niini nga kasinatian kanimo?
- Sa unsang paagi konektado ang Moroni 10:5 sa imong gitun-an?

Mga Pioneer sa tibuok Kalibotan

American Samoa

“Ang Dios Miingon og Oo”

Si Leva ‘aia Levao nagkinabuhi nga adunay grabe nga mga problema sa panglawas. Sa 2015, natuboan siya og hubag sa iyang mga mata. Naayo ang mga hubag human siya gihatagan og panalangin sa pagkapari sa mga misyonaryo. Nagsugod sila pagbasa sa Basahon ni Mormon uban niya.

Ang pipila ka tawo sa gamayng komunidad sa isla ni Levao wala malipay nga naa siyay bag-ong relihiyon. Gibugalbugalan nila ang iyang mga paningkamot ug gibiyaybiay siya. Pero, nagpabilin siyang lig-on ug wala madugay nagpabunyag. Ang iyang bana nga si Tui, ug ilang tulo ka anak wala madugay misunod niya diha sa tinuhoan, ug si Levao nagserbisyo sa iyang branch isip presidente sa Relief Society. Ang uban, nga naimpluwensiyahan sa iyang dedikasyon, mitawag kaniya nga ang kasingkasing sa Simbahan sa Olosega.

South Korea

“Dili na Gyod Ko Mobatig Kabugnaw”

Si Choi Dong Sull usa ka Presbyterian nga ministro nga mibati nga responsibilidad niyang protektahan ang mga miyembro sa iyang kongregasyon gikan sa Simbahan ni Jesukristo sa mga Santos sa Ulahing mga Adlaw. Pero, nagsugod siya sa pagpakig-istorya sa mga misyonaryo ug nasabtan ang doktrinal nga mga isyu nga nakapali-bog niya. Nahibalo siya nga makapausab sa karera ang iyang bag-ong mga gituohan ug makadaot kini sa iyang relasyon sa iyang amahan, nga tsirman sa Presbyterian nga Simbahan sa Korea niadtong panahona.

Gipili ni Dong Sull nga mabunyagan sa Han River. “Kutob sa mahimo gusto nakong masinati ang bunyag nga parehas kang Jesukristo,” siya mipasabot. Sa gabonon nga buntag sa Septiyembre 5, 1981, grabe ang katug-naw sa tubig sa Han River, pero dihang mihaw-as sa tubig si Dong Sull, gihulagway niya ang kainit nga gikan sa sulod. “Karon nahisakop na ako sa tinuod nga Simbahan sa Ginoo,” matod niya. “Dili na gyod ko mobatig kabugnaw.” Duha ka semana ang milabay, nabunyagan usab ang iyang asawa ug duha ka anak nga lalaki—niin-ing higayona sulod sa mainit nga meetinghouse. Ang pagpasakop sa Simbahan dili sayon para kang Dong Sull ug sa iyang pamilya, apan naghimong posible sa bag-ong mga panalangin. “Ang mga paglutos ug pag-antos . . . human sa akong bunyag dili mahubit sa pulong,” matod ni Dong Sull. “Daghan kaayog nawala namo dihang [miapil mi sa Simbahan], pero mas daghan kami og nabatonan nga labaw pa sa among gipangandoy.”

Côte d'Ivoire

“Mga Pultahan sa Kinabuhi ug Kalipay”

Si Lydie Zebo Bahie ang kinamanghorang anak sa iyang pamilya nga nagpuyo sa panimalay dihang namatay ang iyang mga ginikanan. Kini nga kamatayon miresulta sa grabeng depresyon. Ang iyang pag-umangkon, nga si Faet Nadege, mipaila niya sa Simbahan ni Jesukristo sa mga Santos sa Ulahing mga Adlaw.

Dihang miadto siya sa Simbahan sa unang higayon, gibati ni Lydie ang dakong gugma gikan sa mga sister sa mga organisasyon sa Relief Society ug sa Young Women. Bisan og mihunong na siya pagbasa dihang nagkadepr-eyon siya, mibalik ang iyang maayong pagpunting dihang gitun-an niya ang Basahon ni Mormon. Siya nabun-yagan niadtong Nobiyembre 18, 1995.

Wala madugay human sa iyang bunyag, nakabaton siyang kahigayonan nga ipakita ang gugma nga iyang nadawat pinaagi sa pagserbisyo sa mga organisasyon sa Relief Society ug sa Young Women. Nagserbisyo usab siya isip misyonaryo sa branch, nga nagdapit sa uban sa pagdiskobre sa samang pag-abiabi ug kalinaw nga bag-o lang niyang nakaplagan. “Tanan niini nga mga calling nagpalig-on ug nagtabang nako nga mouswag, sa espirituwal ug sa mental nga paagi,” miingon si Lydie.

Si Lydie nahimong usa sa unang mga sister nga misyonaryo nga nagserbisyo sa Democratic Republic of the Congo Kinshasa Mission.

Gitagana aron Motabang sa Pagpundok sa Israel pinaagi sa Buhat sa Templo ug Family History

1. Basaha ang Doktrina ug mga Pakigsaad 138:57-59, nga mangita kon sa unsang paagi kadtong anaa sa kalibotan sa mga espiritu matubos.
2. Basaha ang mosunod nga pamahayag ni Presidente Henry B. Eyring sa Unang Kapangulohan. Pangitaa kon unsay gibati sa Manluluwas niadtong kinsa moapil sa buhat sa templo ug family history.



Hunahunaa ang Manluluwas kon mahimamat nimo Siya. Maangkon nimo kana nga interbiyo. Iyang gibayran ang bili sa mga sala nimo ug sa tanang espiritu nga mga anak sa Langitnong Amahan. Siya si Jehova. Gipadala niya si Elias. Iyang gihatag ang gahom sa pagkapari sa pagselyo ug pagpanalangan tungod sa hingpit nga gugma. Ug misalig Siya nimo pinaagi sa pagtugot nga imong madungog ang ebanghelyo sa imong tibuok kinabuhi, nga naghatag nimo og higayon nga dawaton ang obligasyon nga itanyag kini ngadto niadtong imong mga katigulangan nga wala makabaton sa imong bililhon nga kahigayonan. Hunahunaa kon unsa ka dako ang Iyang pasalamat niadtong nagsakripisyo sa pagtrabaho ug sa hugot nga pagtuo aron makit-an ang mga ngalan sa ilang mga katigulangan ug niadtong nahigugma kanila ug Kaniya igo nga makatanyag kanila og kinabuhing dayon diha sa mga pamilya, ang labing dako sa tanang gasa sa Dios. Siya mitanyag kanila og walay kinutoban nga sakripisyo. Iyang higugmaon ug pasalamatan kadtong nagsakripisyo sa bisan unsang bili nga ilang mahimo aron tugotan ang ilang mga katigulangan sa pagpili sa Iyang tanyag sa kinabuhing dayon. (Henry B. Eyring, "Mga Kasingkasing Nahiusa sa Pagkabugkos," *Liahona*, Mayo 2005, 78–79)

3. Sa imong hunahuna, sa unsang paagi ang pag-apil sa buhat sa templo ug family history makatabang nimo sa pagsunod sa ehemplo ni Jesukristo?
4. Naa bay personal nga kasinatian, kasulatan, o pamahayag sa usa ka lider sa Simbahan nga gusto nimong ipakigbahin?

Kalihokan sa Pagtuon sa mga Artikulo sa Hugot nga Pagtuo

Lakang 1: Pagpili og usa sa mga Artikulo sa Hugot nga Pagtuo nga gusto nimong tun-an karon ug tubaga ang mosunod nga mga pangutana:

- Unsa nga mahangtorong kamatuoran o mga kamatuoran ang imong nakat-onan gikan niini nga artikulo sa hugot nga pagtuo?
- Sa unsang paagi ang mga pagtulun-an niini nga artikulo sa hugot nga pagtuo makaapektar sa imong relasyon sa Langitnong Amahan ug kang Jesukristo?

Lakang 2: Pagpili og labing menos duha sa mosunod nga mga opsiyon nga makatabang nimo sa pagkat-on og dugang bahin sa imong napili nga artikulo sa hugot nga pagtuo:

- Sag-uloha.* Paghunahuna og ideya nga makatabang nimo nga masag-ulo ang imong artikulo sa hugot nga pagtuo ug paggahin og panahon sa pagsag-ulo niini.
- Pangita og may kalabotan nga mga kapanguhaan.* Pangita og may kalabotan nga mga kasulatan o mga pamahayag gikan sa mga lider sa Simbahan nga konektado sa imong napili nga artikulo sa hugot nga pagtuo. Pwede kang mogamit og mga tool sama sa mga footnote diha sa imong mga kasulatan, ang Topical Guide, ang Giya ngadto sa mga Kasulatan, o ang search function sa Librarya sa Ebanghelyo nga app aron sa pagtabang nimo.
- Paghimo og biswal nga representasyon.* Paggamit og art aron sa pagtabang nimo nga makig-istorya o mopresentar sa mga pagtulun-an gikan sa imong napili nga artikulo sa hugot nga pagtuo. Ang mga ehemplo naglakip og drowing, collage, word cloud, o meme. (Tungod sa sagrado nga kinaiya sa Dios, likayi ang pagdrowing sa mga sakop sa Dios nga Kapangulohan.)
- Paghimo og senaryo.* Paghunahuna og mga sitwasyon nga maatubang nimo o sa ubang tin-edyer, o mga pangutana sa ebanghelyo nga matubag sa imong artikulo sa hugot nga pagtuo. Isulat ang mga senaryo o mga pangutana ug ipasabot kon sa unsang paagi o nganong makatabang ang mga kamatuoran nga gitudlo sa artikulo sa hugot nga pagtuo.
- Ipamatuod.* Isulat ang imong pagpamatuod sa mga kamatuoran nga gitudlo sa imong artikulo sa hugot nga pagtuo. Ihulagway kon sa unsang paagi kini nga mga pagtulun-an nakapanalangin sa imong kinabuhi ug nakapasuod nimo sa Dios.